

IDIOMA Feijóo encárgalle a Anxo Lorenzo, un profesor que traballou para os socialistas, a misión de lograr o consenso de todos os partidos para derrogar o Decreto do Galego

O labirinto presidencial

Galicia Bilingüe acusa o titular da Xunta de mentir nas eleccións ao elixir un ex colaborador de Marisol López

maré · Santiago

De "fraude" cualificou onte a máxima responsable de Galicia Bilingüe, Gloria Lago, que o presidente Alberto Núñez Feijóo elixise a Anxo Lorenzo como novo responsable de Política Lingüística, un home que —subliña— "manipula a realidade" sobre o modelo lingüístico de ensino. O nomeamento abriu, deste xeito, unha nova fronte para o presidente na súa guerra lingüística xa que, segundo Lago, "decepciona aos que crimos nas intencións [de cambiar radicalmente a política lingüística], expresadas durante a pasada campaña electoral".

Coas organizacións de defensa do galego en contra, cunha manifestación convocada para o domingo que apoian colectivos de base, asociacións de escritores e partidos políticos, Núñez Feijóo engade agora a oposición dunha agrupación que o apoiou expresamente nas últimas eleccións e á que el mesmo secundou coa súa presenza en distintos actos de oposición ao uso vehicular do galego. Núñez Feijóo, indica agora Lago, amosa que "non está moi disposto a atender os seus compromisos de campaña".

A elección de Lorenzo (Vigo 1964), que se considera un intento de reconstruír o estartalado escenario da política lingüística tras o seu uso electoral nos últimos comicios, provocou un auténtico tremor no país, entre outras razóns porque Lorenzo traballou para o Partido Socialista e souo para o cargo actual que agora ocupa no anterior goberno do bipartito, antes de que Pérez Touriño se decidise por Marisol López. Para ela realizou, precisamente, proxectos como a exposición *As nosas palabras, os nosos mundos*, que viaxou por distintas cidades e se exhibiu en Bruxelas.

Porén, a inclusión deste profesor da Universidade de Vigo nun goberno do Partido Popular (PP) non é unha sorpresa: xa nas primeiras escaramuzas de Núñez Feijóo para pechar cargos, se rumoreaba que Anxo Lorenzo ocuparía a Consellería de Cultura.

O novo responsable de Política Lingüística non o terá fácil na misión encomendada por Feijóo: derrogar o Decreto do galego no ensino co consenso de todas as forzas políticas, como apuntou Núñez Feijóo ao facer público o nomeamento deste "independente" destinado a santificar o "bilingüismo cordial da rúa", que é como o PP bautizou a súa concepción da normalización fronte ao "desacordo sementado" —din— polo bipartito.



Anxo Lorenzo con Marisol López na inauguración da exposición que organizou para o departamento do bipartito

O PROGRAMA

Encontro coa RAG o Día das Letras en Lánacara

Núñez Feijóo tamén se referiu onte á amoestación da real Academia Galega (RAG), que instou o PP para afastar da controveisía política a cuestión lingüística. Feijóo afirmou que xa mantivo unha conversa co presidente da institución e sinalou que se verá o próximo 17 de maio, Día das Letras Galegas, xa que ten previsto ir aos actos organizados pola RAG, entre eles a unha ofrenda a Ramón Piñeiro.

O presidente galego asegura que

existe "cordialidade" con RAG e que el cre "na liberdade e na normalización do galego. A Academia tamén está de acordo", dixo, á vez que mostraba o seu "convencemento de que non haberá problemas por parte do Goberno", pois mantén a súa intención de "promocionar o galego dentro da cordialidade lingüística", un "excelente tándem que apoiarei sempre", concluíu.

A Asociación de Escritores en Lingua Galega (AELG) sumouse on-

te ao comunicado da RAG e apelou á consideración da lingua galega como "un patrimonio histórico de toda a sociedade" e como parte "con substancial" da súa identidade "como nación e colectividade".

O comunicado xa foi apoiado por asociacións como a Mesa pola Normalización Lingüística ou Partido Socialista, que acusou a Feijóo de conseguir "o que non fixera ningún lograr que un lema que non era de debate, o fose".

Lorenzo "ten que facer compatible a promoción do galego e a liberdade lingüística", explicou Feijóo, a través dun "novo decreto" que —admitiu o presidente— non se sabe moi ben cando podería estar listo pero que, en todo caso, deberá ser —prometeu— froito do consenso.

O vocelero en materia de lingua do Grupo Parlamentario do BNG, Bieito Lobeira, non lle deu tregua e chamoulle a Anxo Lorenzo "verdugo" do galego, dentro da estratexia do PP para "exterminar" calquera "sinal de identidade" de Galicia. Lobeira non está esperando malia a traxectoria de Lorenzo de apoio á normalización. "Paco Vázquez é do PSdeG e o dano que lle fixo ao galego é importante". O deputado reflexionou sobre a intención do PPdeG de "cargarse o escaso marco legal, de entorpecer o consenso e vulnerar os dereitos democráticos do galego" e concluíu que os conservadores son "fieis disciplinados soldados da fundación FAES", dirixida polo ex presidente José María Aznar e autora dun informe onde o galego se considera dialecto froito do "illamento" de Galicia e da súa poboación "rural".

Pola súa banda, o secretario nacional da CIG-Ensino, Anxo Louzao, advertiu que xulgarán "polos seus feitos e o seu futuro" e "non polo seu pasado" o novo responsable de Política Lingüística. "Hai pouco dicía que era unha invención de sectores minoritarios que o galego se impuña e que era necesario estudar medidas e propostas que supuxesen un avance", recordou Louzao para pedirlle ao novo cargo que "manteña" as súas palabras e sexa "consecuente".

A Mesa, pola súa banda, resto importancia ao nome da persoa que se encargue de Política Lingüística e subliñou a súa preocupación polas políticas anunciadas todos os días polos actuais gobernantes da Xunta: "Pode ser máis guapo ou máis feo, ter máis currículo ou menos currículo, máis ou menos capacidade para embaucar, mais é un posto de verdugo para o galego". O presidente da asociación, Carlos Callón, amosou a súa mágoa porque "haxa persoas que se presten a este xogo perverso e estean dispostas a ser a pel de ovella para camuflar o lobo". Lembrou que "as propostas dos actuais dirixentes do PP son claras: derrogación do decreto do ensino, eliminar o galego como requisito nas oposicións e mesmo derrogación da Lei de normalización lingüística".

A Coordinadora Galega de Equipos de Normalización Lingüística (EDNL) valorou "positivamente" o nomeamento polos seus "coñecementos acreditados" e pedíronlle "coherencia" coa liña de traballo e promoción da lingua "que tivo ata o momento": en adición ao seu traballo de apoio ao Plan de normalización. ●

CALLÓN PRESENTA A MANIFESTACIÓN DO DÍA 17

Os galegofalantes caeron ao 17% na Coruña

Tras o apoio o mércorres de varias entidades, como CIG-Ensino, o BNG ou a Asociación de Escritores en Lingua Galega, novas organizacións, como Lugopatrimonio ou a de Gaiteiros Galegos, decidiron secundar formalmente a manifestación do día 17 de maio en defensa da lingua galega e contra a derrogación do vixente decreto do galego no ensino, convocada pola Mesa.

Precisamente onte, o presidente da asociación, Carlos Callón, presentou na Coruña a manifestación, un acto no que deron a coñecer os resultados do estudo da RAG sobre o uso da lingua. "Os datos", dixo Callón, "proban que non hai ningunha discrimi-

nación ó castelán, como din desde o PP, e que se hai unha lingua discriminada é o galego".

O estudo reflicte un contraste entre 1992 e 2004, cunha diminución nas cifras de poboación que declara falar máis en galego que en castelán, ou só en galego, do 35,6% dos anos noventa, ó 17,8%. A caída do uso do galego é común tamén ó resto de cidades galegas, producíndose ata un descenso no mundo rural. Segundo Callón, isto débese á existencia de "grupos radicais que practican o racismo lingüístico". Entre as cidades nas que mellor "resiste" o galego están Compostela e Lugo.

Coa manifestación, busco o lema

"O galego, a nosa columna vertebral", a Mesa pretende manifestar que o galego é unha lingua viva, que todos, ata os que non a utilizan, entenden".

Callón fixo un chamamento á participación na manifestación do 17 de maio. "É necesario que nos mobilicemos en defensa do galego", insistiu, en alusión tanto aos que o empregan como idioma habitual como aos que non. "O galego é un elemento que nos une e como di Manuel Rivas non andamos os galegos sobrados de elementos que nos unan", sentenciou. A manifestación terá lugar o 17 de maio desde a Alameda de Santiago, con servizo de autobuses desde diferentes puntos de Galicia.